

1 PEDRO

Pedroa huakkuruda o'manigmadoya'ate.

**Pedroa huaknopoe'eritaj nogyon
nogyon o'manigmadoya'uyate.**

1 ¹Do Pedro ijjepe on'nigmadoya'ne. Jesucristotaj a'manbatia'pakikaya'po Dios Jesucristoere me'ta'mona'uyne. Jesucristoen huanigpeika'eri mo'enok o'nenbaya' mo'bakmon'uyate. Nogenbayo mo'ika'po Ponto huadaribayo Galacia huadaribayo Capadocia huadaribayo Asia huadaribayo Bitinia huadaribayo mo'ika'ne. ²A'nenda Apag Dios o'pakpo opudtaj bokbatie'ea'uyate. Oy Jesucristotaj moknopoe kenda Dios o'nopoika'uyate. 'Urunopo' yan'nopo'toika'po Jesucristoenyo'da yan'nigpeika'po Diosen Nokirega mo'nopo'toika'ne. Kenpa'ti opudomeytaj bokkahue'po Jesús mo'nigbueypo mimia mo'nopo'tihueke'po. Ken Dios 'urua'da botihuapokike' kenpa'ti mo'nopo'noeyike'po, ijtiona'paki ken.

**Diosere 'uruda
o'noeonhuahuika'apoy
kenda oknopoikay.**

³Dios Jesucristoen Apag 'urunanada o'e mon'batia'pakika'. Oro'omeytaj mo'matinepahuie'po Diosen Nokirega mo'nopo'toedepo Diosensi'poa'

o'yahuedepo kenpa'ti Dios Jesucristo e'bueytada o'noyhuada'uynok oro'takon mo'manoyhuada'apone Diosere o'noeonhuahuika'apone oknopounhuahuika'ne. ⁴Kurudyo Dios 'urunanada mo'nigkadhuahuika'depo daka' mo'matounhuahuika'po kenda Dios o'ka' huadakda o'unhuahuika'apo batitikhue'dik o'eaponok durugda o'unhuahuika'apone. ⁵Dioštaj oknopoenok teyda bo'tiokika'po mo'tounhuahuika'po nogok kene'huaya' huame'noete kurudyo bo'tohua'apone.

⁶Konigepo durugnanada mo'ene. Oypi' ijhue' ehue' pai'da e'nopo'epi' sue'da dakhuea' e'ka'ta' e'pakpi' daka' moknopoe'po durugnanada mo'ene.

⁷Dioštaj opuden eknopoe' Diosa huakka' o'pak. Eknopoe' konig huakka'teda o'unhuahuika'. Oro sirokupenayo huakka'teda ee'tada nogok ehue'da o'eapo. Kenpa'ti oro menpa'ti oroyo' yaet a'nopoeya'po huatihue' ta'aka e'ika'yo on'tihuepo. Opuomeynayo hueretda moknopounhuahuika' Diosa mo'tinopoe'po pai'da mo'nopo'epo batikhue' moknopounhuahuika'po nogok Jesucristo e'tiakte "Uruda mo'ene." "Huadakda ogkika'." Diosa bo'huaa'apone. 'Uruda o'ne aya'ada mo'tinopoe'apone.

⁸Jesucristotaj tiahuyhue'pi' e'ika'da di' mo'ene. Kenpa'ti oy

tiahuayhue' e'ëada moknopoëpo digá'da mo'madurugpak.

⁹Moknopoehuahuiika'nok dakhuea' e'ka' Diosa bokkahuea'apopo mo'manopo'yarea'apopo konig Diosensi'po Jesúsere kurudyo mo'noeahuahuiika'apone.

¹⁰“Opudomeytaj mo'matinepahui'apone Diosa kenpa'ti dakhuea' e'ka' bokkahuea'apone, onte'ti mo'noeahuahuiika'apone.” A'nennada Diosen huamanbatia'pakeria kenda o'mana'uyate. “Monig kenda Diosa mo'nigka'apone.” E'nope'ta' onpakpo on'batia'pakuyate. ¹¹Cristo pai'da o'nopo'ëpo o'bueyapo o'noyhuadapo huairi o'ëpo Diosere onte'ti o'mana'apo, onte'ti huiyokda o'mana'apo. Ken Diosen huamanbatia'pakeria a'nennada on'manigmadoya'uyate. Cristoen Nokiregá o'manopoëa'nok kenda on'manigmadoya'uyate. Jesús si'poëhued on'manigmadoya'uyate. Nopoenkahue'ada on'manigmadoya'po be'a pai'da o'nopo'ëapo mo'nigbueyapo kenpa'ti menoka' o'manigbueyapo digá' e'nope'ta' on'pakuyin'á. ¹²Ontehupa'da madoyahue' e'ëada oro'omeytaj mo'nigmadoya'uyate. Kenda Diosa o'manopoëa'uyate mo'nigmadoya'uyate. Oy huabokerek Diosen Nokiregá o'manopo'toenok huadak hua'a mon'batia'pakdepo oro'omeytaj dakhuea' e'ka' kan'nopo'yare'po Jesús o'si'poë'po pai'da o'nopo'ëpo mo'nigbueypo mo'nignoyhuadpo kenda on'manbatia'pakuyate. Kenda Diosen huata'moneriakon kurudya' e'nope'ta' on'pak.

Dios kenyo'da huadakkanada o'ika'. Oro'omey konigti huadakkanada mogkika'ne.

¹³Konigepo katepi' mogka'po daka' mon'nopoëpo mogkika'. Jesucristo

e'tiakte Diosa mo'matinepahui'apone. 'Urua'nanada mogka'apone. Daka' mo'nonmaboika'po huadak mogkika'.

¹⁴A'nenda Diostaj oknopoëhue' ee'te nogtaj nogtaj o'eretpakika'uyne. Dakhuea' e'ka' o'eretpakika'uyne. Oynayo Diosensi'po o'ëpo dakhuea' e'ka' pakhue' mo'ne. ¹⁵Dios kenyo'da huadakda o'ika'po kenpa'da 'uru'nanada o'kika'nok oro'omeykon Diosensi'po o'ëpo 'uru'nanada mogkika'. ¹⁶Apagba' o'mana'po, “Dios kenpa'da huadak o'kika'nok. Dioseny'oda 'uru'ada yag'kika'.” Apagba'te kenpa' mo'nigmadoya'uyate.

¹⁷Kenda katepi' o'kika'nok Apag Diosa aya'tada konigti digá' magka'dik mo'ëapone. Dakhuea' eka'nayo digá' ogka'dik mo'ëapone. Diostaj “Pag” be'api' ena'nayo okme'pukdik o'ika'pone. ^{18,19}Oro'omeyen adhuea'pane' Diostaj nigpeëhue'ada nama'da ogkika'uyate. A'nen oro' konigti nama'da o'kika'uynig'a mo'nopo'yarepo Diosere mo'noeahuahuike'po Jesucristoa mo'nigbuey'uyate. Jesús konig oveja 'uruso'da o'ëpo mo'nigbueypo mimi o'hua'uyate. Orokupe sirokupepi' oro'omeytaj kan'nopo'yare'po Diosa yokhue' o'uyate. ²⁰Huadari niokpo siokpo aya' o'tiahuayika'nig Diosa kahued “Aratbuttaj kamanigbueye'po huadariyo i'si'poë'apo.” Diosa ona'uyate. Huabo'ada o'si'poëdepo bo'huahuaya'uyne oro'omeytaj. ²¹Jesús e'bueytada Diosa o'noyhuada'po kurudyo o'tobehuiiko' 'urunanada o'yahue'uyate. Jesucristotaj oknopoëpo Diostakon oknopoëne. Diosa' mo'noeahuahuiika'apone oknopoëne.

²²Kenpa'ti oy Diosen Nokiregá mo'nopo'toenok Diosen buttida hua'a o'nigpeehua'apo 'urunopo' o'nopo'toedepo huama'buy huidpoeretaj di' mon'maika'. Huayahuaya di' mon'maika'po

huanopoabeta' mon'eretpakpo di'
mon'maika'. Diga' di' mon'maika'. ²³Huaoj
huayeere on'mabueyika'nig ke'nanayo oro'taj
noeanhuahuikahue'dik e'çada Diosba'taj
oknopoenok Diosa mo'si'poe'ayune.
Diosba'a mo'noeanhuahuika'nok oro'omeya
oknopopepo o'noeanhuahuika'apone.
²⁴Kenpa' Apagba'te o'manigmadoya'uyate
oa'po,

Toket huakpi ida o'ay. Aratbut
konigti ida o'tone'pakpo o'buey.
Kenpa'ti huakhuen 'urunanada
e'çada ida o'kot. E'hue'da o'èapo.
Aratbut konigti 'urunanada
e'çada on'bueyapo. 'Urunanada
katepi' e'ka'ada ehue'da o'neapo
²⁵Dios Huairien hua'anayo
o'unhuahuika'apo. Batikhue'dik
o'èapo. Kenpa'da o'unhuahuika'apo.
Kenda Apagba' oa'uyate.

Ken hua'a Jesucristoen huadak
hua'a Cristoen huamata'mona'eria
mon'batia'pakonhua'ayne opudomeytaj.

2 ¹Konigepo dakhuea' e'ka' kenpa'da
ya'nenpo yan'batik. Onte'ti
dakhuea' kahue' yane'. Nama'da onahue'
yane'. Dakhue'da e'çada "huadakda
ijjey," batia'pakhue' yane'. Kenpa'ti dig
bahuhuayhue' yane'. Kenpa'ti bahua'ehue'
yane'. ²A'kerekyapo yobed dig'da
e'mi'nogta on'pak. Opud huaboada
huaknopoe'eri mo'epo konig Diosen yobed
mo'epo Diosensi'po mo'epo Diosen hua'a
yaderetpakika'. Diostaj daka' aknopoikaya'po
Diosen hua'a yan'noipoika'po yan'nigpeika'.
Nogiti nogiti Diostaj yanoknopoe'. ³Jesús
Huairia mo'matinepahui'nok nogiti
bo'eretpakpo nogiti yanoknopoe'.

**Jesucristo konig jak huaka' huid
o'e. Oro' huaknopoe'eri konig
jak huaka' huidsipo o'ene. Konig
Diosen jak o'epo Jesucristo
mo'noeanhuahuika'ne.**

⁴Jesucristo Huairi konig jak iddu
enta'poeda' huid o'epo aya' jak huid

onta'tihuedika'nig. Aratbutanayo Jesús
Huairita' pakhue' ee'tada Diosnayo
huakka' o'pakpo konig huamanoea'
huid oktie'ea'uyate. Jesucristo Huairi
huamanoeanhuahuika'eritaj daka'
yanoknopoe'. ⁵Opudnayo konig Diosen
huid huakpa mo'epo mo'nigpeika'po
Diosen Nokirega mo'nopo'toepo
Diostaj mo'noeanhuahuika'po
Diostayo'da yan'nigpeika'. Nogomey
nogomeytaj yan'maknopopepo
Diosa kamanopo'yare'po
yan'manigtiona'pakika'. Kenpa'ti
Jesucristotaj moknopopepo huadaky'o
yag'kikati'. Huayahuaya di' yan'maika'.
Dakiti Dios ya'nona'ika'. Kenda Diosa
o'pak. ⁶Kenpa'ti a'nenda Apagba' oa'po,
Jesucristotaj o'batia'pakpo,

Keyo Jerusalén jakyo, ken judío
aratbutenbayo ijta'mona'apopo
ke'na konig do'hued jak
enta'poeda' huid ijhuada'apoy.
Kentaj yoktie'ea'po huakka' ijpak.
Aya'ada kentaj o'noknopopepo
durugda o'neapo. Birahue' o'neapo.

⁷Opudomey Jesucristotaj moknopopepo
huakka'da bo'pakika'ne. Oknopohue'
huae'eritaj Apagba' o'batia'pakpo,
Jak huaka'erioimey 'uru jak
enta'poeda' huid on'tiahuaypo
pakhue' e'ne'tada ke'na konig
Diosen 'uru jak enta'poeda' huid
o'e. Apagba' oa'.

⁸Kenpa'ti
Ke'na konig dagte huid e'huedte o'epo
aratbut on'pakpo konig tiahuayhue'
o'nepo on'tikudepo on'huedato'.
Kenda Cristotaj o'batia'pakuy, aratbut
huadak hua'a Jesucristotaj e'nigpeeta'
pakhue' o'nepo dakhuea' ogka'po
kenpa'da ehue'da o'neapo. Kenda
a'nenda Diosa o'nopoe'uyate.

Diosen aratbut o'maene.

⁹Oro'omeynayo Jesucristotaj
o'pakpo oknopoenok Diosa

mo'baktie'ea'uayne. Kenpa'ti Dios Huairien huamanigtiona'pakeri o'ene. 'Urunopo' monopo'ka'po Dioseno'da 'urua'nada kika'dik o'ene. Diosen aratbut o'maene. A'nenda oknopohue' o'epo dakhuea' o'kika'uayne konig sikkiregyo o'ika'uayne oro'omey. Diosa mo'tinepahui'po mo'nopo'yarea'po konig Diosen huakjeyyo mo'bakudā'uayne. "Urua'nanada Diosa mogka'ne. 'Urunanada Dios o'epo o'kika'. Dakiti Dios." Oy batia'pakdik o'ene. Kenda Diosa o'pak. ¹⁰A'nennayo Diosen aratbut ehue' e'ēada oynayo Diosen aratbut o'ene. A'nenda Dios mo'tinepahui'uayne oknopohued o'uynig'a oynayo mo'tinepahui'ne oknopopepo Diosensi'po o'ene oro'omey.

**Dioseno'da yag'kika'po
'urua'nanada yag'kikati'.**

¹¹Nogda e'mana'ta' ijjeretpaki, huadi'da egomey. Jesucristo huaknopoe'eri mo'epo Diosensi'po mo'epo iyo indariyo konig esoeri mo'enok konig huanopo'a nama'da o'eretpakika' kahue' yanika'. Dakhuea' kikhue' yane'. Toto' Diostaj e'baktiparatta' bo'eretpakika'ne. ¹²Huakka'ada Diostaj oknopohue' o'ne. "Dakhue'da mo'ene," nama'da opudomeytaj e'huaa'pi' 'urunanada yag'kika'. Huadakda yag'kika'. Kenda bo'tiahuayapone. Kenme'noe Dios e'tiakte "Dakiti Dios." "Dios 'uruda o'ka'." On'huaa'pakapo.

¹³Jesús Huairi o'paknok aya'ada gobierno huairitaj yan'nigpeika'. Presidente huairitaj yan'nigpeika'. ¹⁴Kenpa'ti Presidenteen huairi ka'yahue' teniente gobernadortaj sorotataj yan'nigpeika'. Ken huairi dakhuea' huaka'eritaj castiga on'magka'ika'. Huadak huaka'eritaj "Huadak ogkika'," on'bahuua'ika'.

¹⁵Huadakda e'kika'te oknopohue'

huae'eri nama'da bahuahue'dik o'ne. Kenda Diosa o'pak.

¹⁶Jesucristotaj moknopopeo oy toto'en huanaba' ehue'da mo'epo katepi' bo'pakpo kika'dik mo'e. Katepi' huadak e'huae' kika'dik mo'e. "Katepi' ijpakpo ka'dik ijjej. Dakhuea' ka'dik ijjej." Nopohue'ada Diostaj yan'nigpeika'. ¹⁷Aya'tada huadakda yan'maknopoika'. Jesucristoen huaknopoe'eritaj di' yan'maika'. Diosa dakhuea' huaka'eritaj huiyoknanada o'magka'apo kenpa'ti huadannada o'ika'. Diostaj daka' yanoknopoika'. Gobierno huakhuairitaj huadakda yan'maknopoika'.

**Jesucristo o'bueypo pai'da
o'nopo'epo bahuadiayahue'ada
o'buey'uyate. Oknopohue'
huae'eria dakhuea' egka'te pai'da
yan'nopo'epo Jesucristonig
bahuadiayahue' yanika'.**

¹⁸Huanaba' ee'nayo o'nen huairitaj huadakda yanoknopoika'po yan'nigpeika'. Huadak e'huae'taj yan'nigpeika'. Dakhuea' huaa'eri huairitakon yan'nigpeika'. ¹⁹Diostaj mo'nigpeika'po huadakda e'kika'te ontaj noga nama'da dakhuea' egkayo bahuadiayahue' yane'. Bahuadiayahue' ee'nayo Diosa durugda mo'toeapone. ²⁰Opu dakhuea' eka'nayo kena'po castiga egka'te diayahue' ee'nayo "Huadak i'e," Diosa onahue'dik ee'tada huadak e'ka'tada huairia castiga egka'nayo, huadiayahue' ee'nayo "Huadak i'e," Diosa ona'apo. ²¹Huadak e'kika'te dakhue' egka'nayo huadiayahue' yane'. Kenda Diosa o'pak. Jesucristoa mo'nigbuey'uyate. Pai'da mo'nignopo'e'uyate. Kentaj monoknopopeo pai'da mon'nopo'epo huadiayahue' mo'neunhua'. ²²Jesús nayo dakhuea' kahue' o'ika'uyate. Sippi' nama'da ahue' o'ika'uyate. ²³Dakhuea' ena'tepi' madeahue' o'uyate. Pai'da

e'nopo'eá'te bahuadiayhue' o'uyate. Apag Diosa daka' me'toika'ne oknopoika'po Dios buttida o'nopoika'po daka' o'matinopoepo castiga o'magka'apo Jesúsa oknopoe'uyate. ²⁴Oro'en dakhuea' e'ka' a'batikaya'po onte'ti huadakdakon akikaya'po huaso' oro'en dakhuea' e'ka' o'toepo hueypa cruzte mo'nigbuey'uyate. Oro'taj mo'nopo'yarea'po mo'nigenhuaduyate. ²⁵Oro' konig oveja o'ika'uyne. Ovejaomey ida o'yoyahue'. Dag meyon ya'e nopoehue' o'ne. Oro' konigti Diosendagya' diga'da o'yoyahue'ika'po dakhuea' e'kika'tada oynayo Jesucristo oro'en huairitaj o'kumejdene. Oro'omeytaj bo'tiokika'ne.

In konig huatoe'taj kika'dik mo'ne.

3 ^{1,2}Ettone' huatoe'taj yan'nigpeika'. Huakka'iti Jesucristoen huadak hua'a oknopoe'ued ee'nayo kanoknopoe'popi' daka' yan'nigpeika'. Daka' yan'baa'ika'. Daka' yan'manhuada'ika'. Nogbokerektaj mune'bohue' yane'. Madi'pakhue' yane'. Kenpa'da Diostaj yan'pakpo huadak yag'kika'. Huatoea bo'tiahuayo apakhue'da Diostaj yanoknopoe'apetpi'. ³Sue'ada ettone' hua'enda kenpa'da 'urunanada ee'ta' o'deretpakika'. Huakuhuij 'urunanada e'kika'ta' o'deretpak. Huakka' oro sakbij e'matihua'kta' o'deretpakika'. Huakka'teda e'huae' huaok e'baotta' o'deretpakika'. Ken konig pakhue' yane'. Ken konigti me'pukehue' yane'. ⁴Kenyo'da 'urunopo'da yan'pakika'. 'Urunopo'da o'unhuahuika'apo. Batikhue' o'eapo. Daka' o'nopoika'po diayhue' o'e. Kenpa'ti yan'no'noey'. Kenda Diosa o'pak. ⁵Konigti a'nenda a'neneri ettone' Diostaj huaknopoe'eri ogkika'uyate. 'Urunopo'da Diosen huadakda ogkika'po huatoe'taj on'nigpeika'uyate. ⁶Sarakon

Abrahamen huatoe' o'nigpeika'uyate. "Do'hued huairi" ona'po o'nigpeika'uyate. Konigti huadak e'kika'nayo kenpa'ti me'pukhue'da huatoe'taj e'nigpeika'nayo konig Sara i'eapo. Diosa daka' bo'kika'apone.

⁷Huabokerekkon huatoeere daka' yanikati'. Daka' yan'tinopoepo yan'toika'. Ettone' sue'da tey o'enk daka' yan'toika'. Huatoeere moknopoe'po Diosere mo'noenhuahuika'apo. E'tiona'pakte Diosa mo'pee'po huatoe'taj 'urua'da yan'toika'.

⁸Kenpa'ti opudomeytaj ijmana'apoy. Konigti noga noga yan'nopoika'. Huayahuaya yan'matinepahuika'po huaknopoe'eri huayahuaya di' yan'maika'. Huayahuaya daka' yan'matoika'. "Donayo huadakda ijje," huata'da tinopoehue' yane'. ⁹Be'api' dakhuea' egka'nayo konigti e'ka'tino ehue' yane'. Kentaj dakhuea' kahue' yane'. Noga e'tidike'nayo kentaj dakhuea' huahue' yaepo huadaka'da yanati'. Kenpa'ti kentaj daka' yationa'pakikati'. Diosa daka' yagka' yationa'pakikati'. Kenda Dios o'pakpo oro'takon huadak mogka'apone. ¹⁰Konigti Apagba' oa'po,

Durugda e'noika'ta' e'paknayo dakhuea' ahue' yane' kenpa'ti da ahue' yane'. ¹¹Dakhuea' e'ka' yan'nopo'korea'po huadakda yag'kikati'. Aya'tada yan'manoeynoeypo huadiayhue' yane'. ¹²Jesús Huairi huadak huaka'eritaj daka' o'matoika'nok huadak huaka'erien e'tiona'paktaj o'peika'. Dakhuea' huaka'eritaj mapeehue' o'ika'. Kenda Apagba' oa'.

Huadak ogkika'depo huaknopoe'eri o'nenok pai'da on'nopo'eapo. Oknopoehue' huae'eria on'huadiaypo dakhuea' o'magka'po pai'da on'manopo'e'apo.

¹³Huadakda e'kika'nayo dakhuea' ogkahue' mo'eapetpi'. ¹⁴Huadak

i'ka'po Jesucristotaj iknopoenok be'api' dakhuea' egka'nayo pai'da e'nopo'ea'nayopi' durugda yane'. Mididhue' yane' kenpa'ti me'pukhue' yane'. ¹⁵ Jesucristo Huairitaj daka' yanoknopopepo konig do'hued huakhuairi mo'taene huanopoya'da daka' yanoknopoi'ka'. "¿Mena'po Jesucristotaj moknopoe?" Be'api' ena'te daka' yan'nopopepo buttida huadik yan'madea'. Diostaj daka' yanoknopopepo 'uruda yan'madea' kenpa'ti huata'da 'huadakda ijje'y' tinopoehue'ada yan'madea'. ¹⁶ Diayahue' mo'epo huadak yan'madea'po huadakyoy' yag'kika'po birahue'dik mo'epo. Jesucristotaj moknopoenok en'tidike'nayo nama'da ijjay on'nopopepo yan'bira'apetpi'. ¹⁷ Huadaknada e'ka'ada. Diosa e'paknayo pai'da nopo'e'dikpi' kenda huadakda o'e. Dakhue' i'ka'po pai'da e'nopo'enayo kennayo dakhue'nanada o'e.

¹⁸ Jesucristo kenpa'da huadakda e'ika'tada oro'nayo dakhuea'nanada o'kika'po Diostaj nigpeehue' o'ika'uynig'a oro'en dakhuea' e'ka' a'bakkahueaya'po mo'nigbuey'uy. Diosere a'manoeahuahuikaya'po mo'nigbuey'uyate. Noga'tida o'buey'uyate. Huaso'nayo e'bueyada Jesús Nokireg o'noehuahui'ka'apo. ^{19,20} A'nenda Noé e'noe'oka' kusi'petone' e'kadhuahuika'te Diosa o'manigunhuahuika'po huakka'da Diosen hua'ataj en'peunhuahua'tada nigpeehue'da on'ba'takotpo on'mabuey'uyate. Nokiregomey huanokireg huakudbayo e'nika'yo Jesús Nokireg o'hua'depo huadak hua'a o'manbatia'pokonhuahua'uyate. Huanokiregtaj o'manbatia'pakonhuahua'uyate. Kusi'petone'yo Noéere ocho aratbut bata'kothue' o'nepo. Diosa o'matoenok hue'eyya' bueyhue' o'nuyate. ²¹ Konigti

oy Diosa oro'omeytaj mo'nopotoepo mo'nopo'yarea'ne. Hue'eya bautiza egka'te Diosa 'urunopo' mogka'ne. Bautiza egka' so'koyoahue' e'eada konig e'nopo'tihueke' o'e. Oro'en dakhuea' e'ka' mo'nopo'yareaya'po Jesucristo o'noyhuaduyate. ²² Kurudyo o'hua'depo Diosere o'ika'. Diosa Jesucristo huairi o'yahuea'nok aya'tada huiyoka o'mana'ika'. Aya'ada Jesucristotaj nigpeika'dik o'ne Diosen huata'moneri, nog huairiomey. Aya'da on'nigpeika' Jesucristotaj.

**Konig Diosa mo'nopoea'ne
Diosen yag'kadhuahuikati'.**

4 ¹ Hueypa cruzte Jesucristo pai'da o'nopo'e'uyatenok Dios e'paknayo oro'omeykon pai'da nopo'e'dik o'ene. Pai'da e'nopo'ede' onte'ti dakhuea' kahue' o'eapone. ² In huadariyo e'noehuahui'kade'te kenyo'da katepi' hua'enda bo'eretpakika'nig nopoehue'ada kenda Dios o'pak yan'nopoi'ka'po yag'kikati'. ³ Konig Diostaj oknopoehue' huae'eri o'deretpakpo ogkika'po dakhuea' ogkika'nig opudomeykon konigti bo'kika'uy a'nenda. Nogen hua'otaj nogtaj nogtaj mo'baktohuedika'po sinea mo'bakkuda'ika'po, mo'batuktukika'po kenpa'ti e'ketka' diostaj nama'de bo'eretpakika'uyate. Kenpa'da konig bo'kika'uyate. ⁴ Oynayo Diosen bo'kika'nok "Kenpihuay, mena'po inomey huaknopoe'eri oro'ere mayhue' o'ne, mena'po oro'ere bokerekbohue' o'ne. Dakhue'da o'ne." Oknopoehue' huae'eria on'huaa'po opudtaj mo'batidike'po. ⁵ Kenomeytaj peehue' yane'. Nogok Diosa castiga o'magka'apo. Huanoe'eri e'bueytaeri katepi' dakhuea' ogka'uy. Nogda nogda ogka'uy. Buttida o'bahuua'depo Diosa castiga o'magka'apo. ⁶ Konigepo kan'manopo'kore'po Jesucristo huadak

hua'a aya'tada on'manbatia'pakuyate. A'nen aratbutkudaktakon huadak hua'a o'manbatia'pakuyate Jesús. E'bueya o'noknopodepo nokiregyo'da Diosere durugda on'noehuahuiika'apo.

⁷Indariyo aya' Diosa katepi' e'ka'ta' o'pakpo o'kaynig'a a'ti o'dakea'apo. A'ti kene'huaya' huame'noe o'e'apo. Konigepo daka' yan'nopoepo nogta nogta eretpakhue' ya'nika'po daka' Diostayo'da yan'tiona'pakika'.
⁸Diga'da yan'pakpo huayahuaya di' yan'maika'. Kenda Diosa o'pak. Di' e'maika'nayo nogomeytaj mo'manoeya'apo. Nogen dakhuea' e'ka' okkahuea'dik mo'ika'apone.
⁹Durugda huanopoya'da ya'nepo esoeri huaknopoe'eritaj huayahuaya o'nen jakyo yan'batokudika'po aypo yan'batobapika'.
¹⁰Nogpa' nogpa' ka'dik ka'ne'po Diosa bo'tihuapokika'ne. Diostaj moknopoiika'po konig Diosen huadak huamanigtihuapokeri mo'matinepahui'po huayahuaya yan'batihuapoke'.
¹¹Huaknopoe'eritaj be'api' e'manmadika'nayo konig Apagba' o'ika'nig konigda kan'manmadikike'. Huaknopoe'eritaj e'tihuapoknayo Diosa bo'teypaka'nok mon'batiahuapokika'. Ken konig 'urunanada bo'kika'nok huakka'ada Jesucristotaj o'noknopoe'apo on'batia'pakpo, "Urua'da o'e Dios." "Diga'da bo'tihuapokika'." "Teynanada Huairi o'e." Huakka'ada on'batia'pakika'apo.

**Jesucristotaj moknopoenok konig
 Jesucristo pai'da o'nopo'e'uy
 konigti pai'da mo'nopo'e'apo.**

¹²Ken, diga'da mogka'aponig'a me'pukehue' mo'ne. Menpa'ti Jesucristotaj hueretda huaknopoe'eri ya'neta'po diga' mogka'apone, huadi'da egomey.
¹³Pai'da mo'nopo'edepo mepu'kehue' ya'nepo yan'durugpakti'.

Jesucristo cruzte pai'nanada o'nopo'e'uyate. Ken Jesucristoere pai'da e'nopo'enayo durugda mo'e'apo. Jesucristo 'urunanada o'epo teynanada o'epo o'tiakapo. E'tiakde'te durugnanada mo'e'apo.
¹⁴Jesucristoen huanigpeika'eri mo'enok opudtaj en'tidike'nayo durugda mo'e, Diosen 'uru Nokirega mo'nopo'toenok durugda mo'ne. Kenomey Jesucristotaj dakhuea'da en'batia'paktada opudnayo huadakda yan'batia'pakika'.
¹⁵Yan'huadiaypo barakhue' yaneti'. Nogen en'tamae' berehue' yane'. Nogomeytaj dakhuea' kahue' yaneti'. Kenda dakhue'da o'e. Ken konig eka'nayo pai'da nopo'edik mo'ene.
¹⁶Jesucristotaj moknopoenok dakhuea' egka'nayo bakbira' ehue' ya'nepo, "Dakiti Dios, huadakda i'kika'." Yan'tiona'pakikati'.

¹⁷Oyda Diosa castiga o'magka'depo huakkuruda Diosen huaknopoe'eritaj kan'nopoetpake'po sue'da castiga o'magka'depo. Oro'omeytaj castiga e'magka'nayo oknopoe'ehue' huae'eriataj diga'da castiga o'magka'apo pai'nanada on'nopo'unhuahuika'apo.
¹⁸Huadak huakika'eri pai'da e'nopo'unhuahuika'pi' daka' oknopoika'po Diosere durugda on'noehuahuiika'apo. Dakhuea' huaka'erinayo kenpa'da pai'da on'nopo'unhuahuika'apo.
¹⁹Konigepo kenda Dios o'paknok pai'da e'nopo'unhua'nayo huadakyoda mogkika'po, "Daka' bo'tioka', huadak mo'nopo'toe'," Diostaj daka' monoknopoe'apo mon'tiona'pakika'. Diosa aya'da o'ka'uyate. Kenda katepi' oa' o'ka'apo daka' oknopoe'dik o'ene.

**Pedroa huaknopoe'eri huairitaj aya'
 huaknopoe'eritakon o'maboroay'uy.**

5 ¹Jesucristotaj huaknopoe'erien huairitaj o'maboroayne. Dokon huaknopoe'eri huairi ijjepe Jesucristo

cruzte pai'da e'bueyte ijtiahuay'uy. Onte'ti 'uruu'nanada e'tiakde'te kenere huairi ijjeapoy. Kena'po huaknopoe'erien huairitaj ijmana'po, ²Dioštaj huaknopoe'eri opudere egkupopakika'te daka' yan'matoika'po yan'manmadikika'po 'uruda yan'maboroayika'. Diosa huamaboroay bo'yokuyne. Kamatoike'po mo'bayokuyne. Manmadikahue' ahue'ada manmadikahue' yane'. Huanopoya'da yan'eretpakpo yan'manmadika'. Kenda Dios o'pak. Huakka' huakupe pakhue' ya'nepo yan'manmadika'. ³Huiyokda manahue'ada huaknopoe'eritaj daka' yan'manmadika'. 'Urunanada Diosen bo'kika'nok huaknopoe'eri bo'tiahuayika'po konigti 'uruda kika'dik o'neapo. ⁴Jesucristo oro' huaknopoe'erien huamotoe'eri Huairi e'tiakte opud Jesucristoen huaknopoe'erien huairitaj 'urunanada mo'nigkadhuahuika'apone. Batikhue'da mo'nigkadhuahuika'apone.

⁵Jesucristoen huaknopoe'eri huairitaj yan'nigpeika'. Nogomey huadakda o'nepo donayo sue'da huadak ijjey, huayahuaya yan'matinepoe'po huayahuaya yan'batihuapokika'. Konigepo,

'Uruda ijjey huanopoe'eritaj Dios pakhue' ee'tada. Sue'da huadak ijjey huanopoe'eritaj Diosa o'matinepahui'ika'. Apagba'a oa'.

⁶Pai'da e'nopo'enayo Dioštaj huadiayhue' yane'. Diosnayo teynanada o'ika'. Daka' yan'nigpeika'. Nogok 'uruda mo'nigka'apone. 'Urunanada mo'eapo. ⁷Katetapi' me'pukehue' ya'nepo Diosa mo'tinepahui'po bo'tihuapokapone yanoknopoe'.

⁸Daka' yanoknopoika'. Toto' oro'en taka' da ea'ta' bo'tipakika'ne. Engaña egka'ta' bo'eretpakika'ne. Konig huiyokda apetpet o'ika'.

A'barakya'po o'huae'ika'a. Konigti toto'a aratbut huaknopoe'eritaj o'ka'po huaknopoe'eritaj e'batika'ta' bo'tipakika'ne. Konigepo Apagba' daka' yag'kikati'. Daka' yanonmaboika'po 'uruda yanoknopoika'. ⁹Toto'taj nigpeehue' yanika'. Jesucristotayo'da yan'nigpeika'po daka' yanoknopoika'. Jesucristotaj moknopoenok pai'da mo'nopo'eapopi'. Do'tayo'da dakhuea' megka'ne. Doyo'da pai'da ijnopo'ey, nopoe'ehue' yane'. Konigti nogbaya' nogbaya' huaknopoe'eritaj konigti diga'da on'magka'. Huaknopoe'eri pai'da on'nopo'ika' yan'nopo'e'. ¹⁰Oro'taj di'da mo'ene Diosa. O'matinepahui'nok ijhue'mon pai'da o'nopo'eonhua'depo oro'taj mo'nopo'teypakapone. Daka' eknopoe' bo'tihuapokapone. Jesucristotaj oknopoenok kurudyo bo'tohua'apone. Jesucristoere mo'noeonhuahuika'apone. ¹¹Diosyo'da teynanada o'epo aya'tada o'mana'onhuahuika'. Aya'ada Dioštaj nigpeika'dik o'ne.

**O'dikta'mona'po dakhuapa
o'manigmadoya'uy.**

¹²Silvano daka' huaknopoe'eri huama'buy o'e ijnopo'ey. Ke'na be'tihuapokpo in beroba'te mo'nigmadoya'ne. Opudomeytaj sue'da o'nigmadoya'ne. Diosen hua'a nogiti eknopoe' on'maboroayne. Kenpa'ti Dios diga' di' mo'maika'po mo'matinepahui'ne. Mo'matinepahui'po durugnanada mogka'ne. Buttida ijjay. Daka' mo'noknopoe'po batikhue' yaneti'.

¹³Babilonia huakka' jakya' huaknopoe'eri Diosa o'baktie'ea'uyate. Opudere o'baktie'ea'uyate. Opudomeytaj di' o'nepo on'dikta'mona'ne. Marcos do'huedsi'ponig o'epo mo'dikta'mona'ne.

¹⁴Di'da yan'maepo huayahuaya yan'mabajbaj.

Daka' moknopoike'po me'pukehue'da daka' mo'manopo'noeynoeyike', ken.